



SIARAN MEDIA SAMBUTAN HARI WANITA ANTARABANGSA 2016

KUCHING, 8 MAC – Kesaksamaan Gender atau *'Pledge for Parity'* merupakan tema sambutan Hari Wanita Antarabangsa 2016 yang dirasmikan oleh YABhg. Datin Patinggi Dato' Hajah Jamilah Haji Anu, Isteri YAB Ketua Menteri Sarawak di The Spring Shopping Mall, di sini.

Hari Wanita Antarabangsa pada tahun ini merupakan sambutan kali ke-105 sejak ia pertama kali diraikan pada 19 Mac 1911. Tema pada kali ini menekankan bahawa kesaksamaan gender adalah penting dalam mencapai pembangunan sosial, ekonomi dan politik supaya rakyat dapat bergerak ke arah yang lebih baik. Di samping itu, tema ini juga memberi pengiktirafan dan memartabatkan sumbangan wanita kepada pembangunan diri, keluarga, masyarakat dan negara.

Menurut YB Dato' Sri Rohani Abdul Karim, "Hak kesamarataan ini perlu terus diperjuangkan oleh wanita di seluruh dunia. Telah tiba masanya untuk semua golongan sama ada golongan wanita mahupun lelaki, kerajaan atau swasta, di bandar mahupun di desa, baik tua mahupun muda untuk sama-sama berikrar bagi menyokong usaha-usaha mencapai kesaksamaan dalam segenap aspek kehidupan".

Statistik di peringkat Kementerian menunjukkan wanita telah mencapai kejayaan di dalam pelbagai bidang. Sebagai contoh, kadar penyertaan tenaga buruh wanita telah meningkat kepada 53.9% berbanding 49.5%

pada tahun 2012. Selain itu, dasar sekurang-kurangnya 30% wanita di peringkat pembuat keputusan menunjukkan kejayaan iaitu seramai 37.1% berjaya dicapai oleh sektor awam manakala sektor swasta masih rendah iaitu hanya 15.6% sahaja.

Sambutan hari ini dimeriahkan dengan pelbagai aktiviti menarik seperti sesi bual bicara Lan Santai bersama ahli panel yang berkongsi pengalaman dan kisah kejayaan masing-masing serta memberi inspirasi kepada wanita. Selain itu, Kementerian turut mengadakan program MyKasih4U iaitu satu program komuniti yang dilaksanakan oleh kumpulan PERWANI dalam memberikan sentuhan wanita di samping beramah mesra bersama kumpulan sasar Kementerian.

Program pada hari ini turut dihadiri oleh YB Dato' Hajah Fatimah Abdullah, Menteri Kebajikan, Wanita dan Pembangunan Keluarga Sarawak, Dato' Sabariah Hassan, Ketua Setiausaha KPWKM, pegawai-pegawai kanan Kementerian dan Jabatan serta kira-kira 1,500 orang pengunjung.

###

Disediakan oleh:
Unit Komunikasi Korporat
Kementerian Pembangunan Wanita, Keluarga dan Masyarakat
Aras 35, Persiaran Perdana
PUTRAJAYA
Tel: 03-8323 1087
E-mel: info@kpwkm.gov.my